

**AKASHVANI AIZAWL
REGIONAL NEWS BULLETIN**

Date – 25/01/2026

Time - 18:30 Hrs

HEADLINES (EVENING)

1. Naktuk Thawhtanni zing dar 5 atanga Central Young Lai Association (CYLA)-in Lawngtlai District a tiam chin awm lova pawn chhuah khap (Total Bandh) huaihawt an tum chu thulh ani.
2. Thla leh February ni 17 atanga Mizoram state legislative assembly inkhawmah neih turah sorkar bill ngaihtuah tur lut a la awm lo.
3. Nikum chhung khan Mizoram tlawhtu zinmi an pung nasa a, mi nuai 8, sing 4 leh sang khat chuang an tling.
4. Prime Minister Narendra Modi-a'n industry leh Start-Up lama thawkte chu thil tha leh belhchian dawl siamchhuah ngaipawimawh turin a ngen.

<><><>

LAWNGTLAI BANDH

Lai Autonomous District Council (LADC)-ah sorkar a pian mai theih loh avanga, naktuk Thawhtanni zing dar 5 atanga Central Young Lai Association (CYLA)-in Lawngtlai District ah tiam chin awm lova pawn chhuah khap (Total Bandh) huaihawt an tum chu an thulh. LADC ah sorkarna siamthei an awm reng laia sorkar a piang mai thei lo chu hriatthiam har an tih thu Central YLA chuan sawiin, January 22, Ningani khan Central Executive Committee thukhawm chuan, January 24 tlai dar 4 thleng Sorkar a pian leh pian loh an ngaihchan tur thu leh, an beisei anga Sorkar a piang lo a nih chuan na zawka thuneitute nawr nise an ti a. January 24 nimin Inrinni-ah pawh thu lawmawm lam hriattur a awm loh hnu ah nizan khan Central YLA Executive Committee chuan inkhawm hmanhmawh kovin, Thawhtanni zing dar 5 atangin tiam chin awm lovin Lawngtlai District ah Total Bandh kalpui nise tiin an rel a. Amaherawh chu, vawiin tlai khan District Council & Minority Affairs department in hemi chungchangah hian hriattirna a chhuah leh tak avangin bandh huaihawt an tum chu an thulh leh chawpchilh ta a ni.

<><><>

LADC

Lai Autonomous District Council (LADC) a sorkar siam theih na'n larsapin thupek a chhuah angin District Council & Minority Affairs (DC&MA) chuan vawiin tlai khan hriattirna a chhuah.

DC&MA Additional Secretary Pu R. Lalchhanhima'n hriattirna a chhuahah chuan larsap duhdan angin United Legislature party hruaitu Pu C. Lalsawmzuala chu LADC a chief executive member (CEM) atan January ni 22 atanga ruat a nih thu a tarlang a. January ni 28 hian protem-chairman kaihhruaina hnuai-ah Chairman thlan a ni ang a, a tuk January ni 29-ah Pu C. Lalsawmzuala hian thlawptu a ngah leh ngah loh fiahna a hmachhawn dawn a ni. Larsap thu angin vawiin tlai vek khan pro-tem chairman atana Pu C. Hrangthianga a ruatna tihchhuah a ni bawk a. LADC inkhawm tan hma ni, Thawhleghi hian chawhnu dar 3 thleng chairman chuh turte tan hming pek luhna hun hawn a ni ang a, a tuk chawhma dar 10 leh a chanve-ah chairman thlan buatsaih a ni ang. United Legislature Party ah hian MNF MDC 8 leh Congress MDC 7 an vaiin Member 15 an awm a. January ni 9 khan larsap hnenah LADC a sorkar an siam theih thu an lo thlen tawh a ni.

<><><>

R-DAY SECURITY

Naktuka Aizawl Lammual a Republic Day lawmna turah venhimna khauh taka ruahman a ni. Aizawl district SP Pu Zosangliana'n Akashvani Aizawl a hrilh danin sorkar hmun pawimawhah te uluk leh zuala venhimna kalpui a ni a, in chhawng sang te ngaihven zual bik niin Lammual leh Lok Bhavan chung zawnah drone thlawhtir khap a ni a. Lammual chhungah bomb kam ruk a awm leh awm loh pawh bomb senghawi thiamte'n uluk takin an enfiah reng ani. Boruak muanawm tak hnuai a Republic Day lawmna kalpui a nih theih na'n Police te pawh ngawrh takin an duty a . Tun dinhmunah Aizawl a Republic Day lawmna tibuai thei tur boruak engmah a awm thu hriat a ni lo ani.

<><><>

ASSEMBLY SESSION

Thla leh February ni 17 atanga Mizoram state legislative assembly inkhawm neih turah sorkar bill ngaihtuah tur lut a la awm lo.

Assembly secretariat atanga Akashvani News Aizawl in thu a dawn danin Mizoram Legislative Assembly pakuana Budget Session lo awm turah MLA-te zawhna, House chhunga tawngka a chhan chi (starred question) 92 lut tawhin, ziaka chhan chi (un-starred question) 12 a lut tawh bawk a, paper lay tur pakhat a awm tawh bawk a ni. Assembly secretariat-in hriattirna a chhuahah chuan Larsap Gen. Vijay Kumar Singh-a'n February ni 17 atanga tan tura Mizoram state legislative assembly inkhawm a koh hi Assembly pakuana inkhawm vawi 6-na tur a ni dawn a. Tun tum assembly inkhawm lo awm tur hi budget session a ni ang a. Finance changtu Chief Minister Pu Lalduhoma'n ZPM sorkar hnua Mizoram tangka kum khat sum ruahman (state annual budget) a pharh vawi 3-na a ni dawn a ni.

Assembly inkhawm hi chawhma dar 10 leh a chanve-ah tan thin a ni ang. Ni engzat chhung nge inkhawm tur tih leh inkhawm hun hman chhoh dan tur chu January ni 28 khian assembly speaker Pu Lalbiakzama kaihhruai business advisory committee (BAC) thukhawmin an la rel dawn a. Sorkar lamin dan siam tur rawtna leh tihtur dang a chhawp chhuah tam leh tlemah assembly inkhawm neih hunchhung hi a rei-in a rei lo thei dawn a ni.

<><><>

FIRE

Nikum 2025 chhung khan Mizoramah kangmei chhuak vangin cheng vbc 46, nuai 8, sing 8, sang 4, 530 hu in leh lo leh bungrua a kang chhia.

Akashvani News Aizawl zawhna chhangin Fire Department hotute chuan nikum 2025 chhung khan Mizoram hmun hrang hrangah chenna in 31 leh ram 164 a kang an ti a, mi 1 a thih bakah , midang 1 a hliam ani, chenna in leh ram bakah hian bawlhhlawh paihna, lirthei leh thil dang kang report 54 an dawng bawk a, nikuma kangmei chhuakin thil a tihchhiat hlut zawng hi cheng vbc 46, nuai 8, sing 8, sang 4, 530 hu a ni. Nikum March thla kha kangmei chhuah tam ber thla niin, chenna in 6 leh ram 92 a kang a, mi 1 in nunna a chan bawk a, March thla chhunga kangmei chhuakin a tihchhiat hlut zawng chu cheng vbc 3, sing 6, sang 2,330 hu a ni a, June thlaah chenna in leh ram kang report a awm lo thung a ni.

Kumin January thla kal mekah kangmei chhuak vangin cheng nuai 42 hu in leh lo leh bungrua a kang chhe tawh bawk a, kumin January ni 1 atanga ni 23 thleng khan Mizoramah chenna in kang 2, ram kang 2, bawlhhlawh paihna kang 1, lirthei kang 1 leh Transformer/Distributor box kang vawi 2 a thleng tawh tih Fire Department hotute chuan an sawi a. Khua a thal chhoh leh tak avangin hmun hrang hrangah Kangmei chhuah thu hriat tur a awm chho leh ta zeuh zeuh tih sawiin, Kangmei chhuah chhan tam ber chu fimkhur tawh loh vang a ni an ti a, mitin Kangmei laka in leh a vel a him theih nan fimkhur theuh turin an chah a ni.

<><><>

KTP PASTORAL CONF

Mizoram Presbyterian Kohhran te chuan Pastor bial hrang hrangah Kristan Thalai Pawl, KTP Conference an hmang mek a, zanin hian a tiak ang.

Zirtawpni zan kha Palai lawmna leh report inkhawm pual a ni a, nimin Inrinni nilengin Rorel inkhawm leh hruaitu tharna neih thlan a ni a, nizan atang khan Pathian biak inkhawm awm chhunzawmin zanin hian a tiak ang.

Bial Conference hman dan tur hi Bial committee-in ngaihtuahin a remchan dan anga hman thin a ni a, chuvang chuan bial hrang hranga conference hman dan pawh a inang vek lo a, Bial thenkhatah thupui thlan bik neiin speaker ten an sawi thin a, bial thenkhatah chuan thupui thlan bik pawh nei lovin bial hruaituten an in sawi chhawk chang pawh a awm thin a, a remchan dan anga hman thin a ni. Minister Pu Lalnghinglova Hmar chu KTP Conference, ah Tanhril Kohhranah Speaker a ni a, thupui "Tunlai thil awmzia" tih hmangin Inrinni zan atang khan Pathian thu chah a sawi a ni.

Central KTP hruaitute chuan bial hrang hrangah inkhawmpui hi an hmanpui a Report hnunung bera a lan danin tun dinhmunah Bial 223 awmin Branch 907 a awm

mek a, KTP member nuai 1, sing 7, sang 7 leh 548 (hmeichhia 70,013 leh mipa nuai 1, sang 7 leh 535) an awm mek a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

TOURTS FOOTFALL

Nikum chhung khan Mizoram tlawhtu zinmi an pung nasa a, mi nuai 8, sing 4 leh sang khat chuang an tling ani.

Tourism department chhinchhiah danin nikum January leh December inkar chhunga Mizoram rawn tlawhtu mi nuai 8, sing 2, sang 9 leh 839 te chu ramchhung mi an ni a, mi 11,484 te chu ramdang mi (foreigner) an ni. Ramchhung mi Mizoram rawn tlawhtu hi kum 2024 nena khaikhinin za zela 97 velin an pung a, ram pawn mi tlawhtu hi za zela 112-in an pung thung a ni. Nikum September thla a Prime Minister Narendra Modi-a'n Bairabi leh Sairang inkar rel kawng a rawn hawn hnu khan Mizoram tlawhtu hi an pung zual hle a. Kum 2024 September thla khan Mizoram tlawhtu 30,507 an nih lai-in nikum September thla kha chuan mi 95,885 an tling a ni. Nikum bikah December thla kha Mizoram tlawhtu tam ber thla a ni a, mi nuai 1, sing 3, sang 3 leh 520-in an tlawh a ni.

Ramdang mi Mizoram tlawhtu tam ber chu Myanmar atanga lo lut an ni a. Ramdang mi Mizoram tlawhtute ang ni lovin Lawngtlai district a sumdawng a lo lut an ni ber a, nikum June thla atang khan an pung zual a ni.

Ramchhung leh pawn atanga Mizoram rawn tlawhtu, a bik takin nikum December thla a rawn tlawhtute hi biak-inah te inkhawm ve-in Krismas leh Kum Thar lawmna-ah te telin ruaite pawh an theh ve hlawm a ni.

<><><>

MANN KI BAAT

Prime Minister Narendra Modi-a’n industry leh Start-Up lama thawk, ram mipui, a bikin thalaite chu thil tha leh belhchian dawl siamchhuah ngaipawimawh turin a ngen. Wawiin Akashvani-a Mann Ki Baat hun a hmanna-ah he thu hi sawiin ei leh bar lamah India-in chak takin hma a sawn zel a, India-ah khawvel mit a fu mek a ni, a ti a, thla leha India AI Impact Summit neih turah India hmasawwna hrang hrang leh AI khawvela a hlawhtlinna-te tarlan a ni ang, a ti bawk.

Naktukah Republic Day lawmna, ram pumah neih a ni dawn tih sawiin he ni hi ram Danpui hman tan ni a ni, a ti a, Danpui duangtute, zahna leh chawimawina hlanna hun a ni, a ti.

<><><>

PAKISTAN COURT SENTENCE

Pakistan court-in ukil pahnih, Zainad Mazari leh Hadi Ali Chattha-te, kum 17 tang turin nimin khan an chungthu a rem a, ukil 2-te hi sorkar leh ram himna tiderthawng thei thil, social media-ah post-ah puh an nih avangin Islamabad-ah man an ni a, Judge Afzal Majoka chuan dan pawna awmte thil tum thlawpna thu an post a ni, a ti.

Mazari leh Chattha-te hian security force-ten an man mi engemawzat an lo tanpui tawh thin a, Rights group-te chuan man an nih dan chu diklo an tih thu sawiin chhuah turin an phut a ni.

<><><>